

**Kalaallit Nunaanni Inatsisartut Suleriaasiata allanngortinneqarnissaanik siunnersuut**

**pillugu**

**Inatsisartut Suleriaaseq pillugu Ataatsimiititaliaata**

**ISUMALIUTISSIISSUTAA**

**Siunnersuutip aappassaaneerpeqarnerani saqqummiunneqartoq.**

Inatsisartut Suleriaaseq pillugu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Josef Motzfeldt, Inuit Ataqtigiit, Inatsisartut Siulittaasuat  
Inatsisartunut ilaasortaq Per Berthelsen, Siumut, siulittaasup tullia siulleq  
Inatsisartunut ilaasortaq Olga P. Berthelsen, Inuit Ataqtigiit, siulittaasup tulliaata aappaa  
Inatsisartunut ilaasortaq Finn Karlsen, Atassut, siulittaasup tulliaata pingajuat  
Inatsisartunut ilaasortaq Justus Hansen, Demokraatit, siulittaasup tulliaata sisamaat  
Inatsisartunut ilaasortaq Jakob Skade, Kattusseqatigiit Partiiat

**Siunnersuutip imarisaa tunngavialu kiisalu Suleriaaseq pillugu Ataatsimiititaliap oqaaseqaatai**

Inatsisartut suleriaasertik kingullermik 2008-mi novembarip naalernerani allanngortippaat. Allanngortitsinikkut Inatsisartut oqallittarnerat nutaarluinnarmik iluseqalerpoq, tassunga ilanngullugu oqaaseqarnermi piffissaliussat taamanikkut atuuttut tunngaviatigut allanngortinneqarlutik. Oqallittarnerit eqeersimaarnerusumik ingerlanneqartalernissaannik oqaaseqartartullu pilerornerusumik nikittarnissaannik kissaateqarnerit isumannaarneqarnissaat tamatumani siunertarineqarsimavoq.

Tamatuma kingorna piffissami qaangiuttumi Inatsisartunut ilaasortat periarfissaqarsimapput oqalliseriaaseq nutaaq piffissallu oqaaseqarfiusinnaasut nutaat sungiunniarnissaannut. Misilittakkat tunngavigalugit Siulittaasoqarfik naliliivoq assigiinngitsunik iluarsisoqarnissaa pisariaqartinneqartoq, ingammik inimi ataatsimiittarfimmi oqallinnerit ilaannikkut annertuumik sivitsortoorsinnaasarnerat killilerniarlugu.

Naliliissut tamanna Suleriaaseq pillugu Ataatsimiititaliap isumaqatigiittup taperserpaat.

Siunnersuut akuerineqassappat maleruaqqusanut maanna atuuttunut sanilliullugu pingasunik allannguuteqartoqarneranik kinguneqassaaq:

- 1) Partiit oqaaseqartuisa sivisunerpaamik oqaaseqarfigisinnaasaat

sivikillineqarpoq.

- 2) Saqqummiussissutit akissuteqaatillu aallaavittut siunissami oqalulluni saqqummiunneqartarunnaassaapput, Siulittaasoqarfik allatut akuersissuteqarsimangippat.
- 3) Killeqanngitsumik naatsunik malitsigisatut oqaaseqarsinnaaneq akissuteqarsinnaanerlu atorunnaarsinneqassapput. Siunissami partiit tamarmik immikkut pingasuinnarnik apeqquteqarsinnaalissapput.

Allannguutit taakku inersuarmi ataatsimiittarfimmi piffissap suliarinninnermut atornerqartartup annertuumik sivikillieriaateqarneranik kinguneqassasut Suleriaaseq pillugu Ataatsimiititaliap naatsorsuutigaa. Tamatuma peqatigisaanik allassimasunik atuaasarneq killilerneqassaaq, tamatumalu oqallinnerit eqeersimaarnerulersissallugit.

Inatsisartut Naalakkersuisullu pillugit Inatsisartut inatsisaata tungaviusumik nutarterneqarnerata kingunerisaanik Inatsisartut Suleriaasiannut nutaamut siunnersuummik ukiakkut ataatsimiinnermi saqqummiussisoqarnissaa Suleriaaseq pillugu Ataatsimiititaliap eqqumaffigaa.

Taamaalilluni maanna ataatsimiinneq oqaaseqarnissamut piffissaliussanut nutaanut misileraaffiusutut atuutissaaq. Iluarseeqqinnissaq pisariaqartinneqassappat taakku ukiakkut ataatsimiinnissami Inatsisartut Suleriaasiannut nutaamut siunnersuummut ilanngunneqarsinnaassapput.

Siunnersuummili saqqummiunneqartumi naapertuutinngitsut ataasiakkaat maannangaaq iluarsineqariissasut Suleriaaseq pillugu Ataatsimiititaliaq isumaqarpoq:

- a. Apeqqutit ajornartorsiutillu inersuarmi oqallinnermi saqqummiunneqartut tamakkiinerusumik akissuteqarfiginissaannut Inatsisartut qulakkeerunneqarnissaat siunertaralugu Naalakkersuisut/siunnersuuteqartut naggataarutaasumik oqaaseqarnissaannut piffissaliussat sivitsorneqartariaqarput.
- b. Siunnersuutit akissuteqaatillu tamanna kissaatigineqarpat oqaatigalugit saqqummiunneqarsinnaanerata ingerlaannassaaq.
- c. Suliap annertunerata tamanna pisariaqalersippagu qinnuteqartoqarneratigut oqaaseqarnissamut piffissaliussatut aalajangersakkat Siulittaasoqarfimmit avaqqunneqarsinnaassasut ilanngussami erseqqissaatigineqartariaqarpoq.

d. § 2-p kalaallisoortaa danskisuaanut naapertuuttunngortinneqartariaqarpoq.

Tamanna naapertorlugu Suleriaaseq pillugu Ataatsimiititaliaq allannguutissatut siunnersuummik saqqummiussissaaq.

### **Suleriaaseq pillugu Ataatsimiititaliap inassuteqaatai**

Allannguutissatut siunnersuut akuersissutigineqassasoq Suleriaaseq pillugu Ataatsimiititaliami amerlanerussuteqartut Atassutip, Demokraatit, Kattusseqatigiit Partiiata Inuit Ataqatigiillu ilaasortaataasa inassutigaat. Ikinnerussuteqartup Siumup ilaasortaataata oqaaseqartumut malitsigisaanik oqaaseqaatit akissuteqaatillu tallimannngortinneqarnissaat allannguutillu UKA 2010-mit aatsaat atuutsinneqalernissaat kissaatigaa.

Taamaalilluni siunnersuut aappassaaniigassannngortinneqarpoq.

Josef Motzfeldt  
Inatsisartut Siulittaasuat

Per Berthelsen

Olga P. Berthelsen

Finn Karlsen

Justus Hansen

Jakob Skade